

Kombo ya Nkolo na biso Yesu Kristo epambolama.

Boyei nyonso, tóyékola Biblia.

Omitunaki naino soki mpo na nini bitumba ya basoda ezalaka mpasi mingi? Ezala basoda bazali kolata bilamba ya kobatela bango, bazali na bibundeli, na bibomi-bomoni nyonso, kasi kaka bitumba ezalaka mpasi. Omitunaki mpo na nini?

Ezali mpo ete moto oyo ozali kokende kobunda na ye, azali lokola yo. Monguna mpe asimbi bibundeli lokola yo, alekisi mateya lokola yo, mpe alata bilamba ya kobatela lokola yo. Na mokuse, nyonso oyo mosoda moko azali na yango, monguna na ye mpe azali na yango. Kuna nde mpasi ya bitumba ewutaka.

Mpe ezali kaka te na bitumba ya basoda, ata na masano ya mokili oyo bato basalaka, ezalaka mpasi. Mpo ete baoyo bazali kosakana na bango, bango mpe babongisami malamumu, bazali na mayele lokola bango, mpe bazali na mayele ya makanisi lokola bango.

Na mokili ya molimo mpe, esengeli tóyeba likambo yango malamumu: tozali na bitumba, mpe moto oyo tozali kobunda na ye

azali te na maboko mpamba, kasi ye mpe azali mosoda lokola biso.

Ntango tozali kotanga Baefese 6:11, Biblia elobi:

“Bolata bibundeli nyonso ya Nzambe, mpo bótelema malamuna liboso ya mayele mabe ya Satana.”
(Mokanda)

Yango elakisi ete na ngambo mosusu, Satana mpe asimbi bibundeli. Soki azalaki mosoda te lokola biso, Biblia elingaki koloba ete tózua nguba te. Nguba mpo na nini, soki monguna azali na ebundeli te? Omona?

Na mokuse, na mokili ya molimo, nyonso tozali pene-pene na lolenge moko: Satana, bademo na ye, mpe biso. Nyonso tozali na bibundeli.

Soki okobi kotanga na Baefese, okomona Biblia elobi tózua mopanga ya Molimo, oyo ezali Liloba ya Nzambe. Kasi likambo ya ntina esengeli koyeba malamuna: mopanga yango moko, Satana

mpe azali na yango. Liloba ya Nzambe oyo biso tosengeli kosalela mpo na kokata ye, soki tozali na bokebi te, ye mpe akoki kosalela yango mpo na kokata biso.

Okoloba: “Satana azwaki wapi Liloba ya Nzambe mpo na kosalela yango liboso ya moto ya Nzambe?”

Tángá Luka 4:9–13, okomona ndenge asalelaki Liloba mpo na komeka Nkolo Yesu na esobe.

Yango wana, mosoda ya solo oyo azali na bitumba asepelaka te kaka mpo abeti bunduki to alata bilamba ya soda. Mpo ayebi ete monguna na ye mpe asimbi bunduki lokola ye. Ayebi ete soki azali na bokebi te, akoki kokufa na bibundeli na ye kaka na maboko. Yango wana eloko oyo apesaka motema na yango ezali mayele ya kosalela ebundeli, makoki ya koboya, ya kobatela, mpe ya kosala na lombangu mpe na mpiko.

Soki mosoda alali kaka mpe alobi: “Nazali na bunduki, nalati bilamba ya kobatela”, ezali polele ete mosoda wana akokende kokufa.

Bandeko, lokola basoda ya Kristo, tosengeli te kaka kosepela na

kokanga Liloba na motó, kasi tosengeli kosepela na makoki ya kososola mpe kosalela Liloba malamú, lokola Nkolo Yesu azalaki kosala. Mpo Biblia elobi ete Liloba ya Nzambe ezali mopanga ya mino mibale, ezali na makasi na ngambo nyonso. Yango elakisi ete soki monguna asimbi yango, akoki kosala yo mabe mingi soki ozangi mayele.

Lokola tolobaki liboso ete Satana na bademo na ye bazali basoda lokola biso, balati bilamba ya bitumba, mpe bazali na mayele ya kosalela bibundeli, yango wana mayele na biso mpe bososoli na biso ya Liloba nde ekolonga bango.

Sikoyo okomituna: “Biblia elobi wapi ete bademo bazali basoda?”

Baefese 6:11–12 elobi:

“Bolata bibundeli nyonso ya Nzambe, mpo bótelema liboso ya mayele ya Satana.

Mpo bitumba na biso ezali te na nzoto mpe makila, kasi ezali na bokonzi, na makoki, na bakambi ya molili ya mokili oyo, mpe na MAJESI YA BADÉMO MABE na mokili ya molimo.”

(Bomoi)

Mituna moko: mpo na nini Biblia elobi “majesi ya bademo mabe” kasi elobi te “ebele ya bademo”? Pamba te bazali basoda, balati bibundeli, bazali na bitumba, bazali kaka te kazingazinga.

Tángá lisusu Luka 8:30:

“Yesu atunaki ye: ‘Kombo na yo nani?’ Azongisaki: ‘KOMBO NA NGAI EZALI JESI’, mpo bademo mingi bakotaki kati na ye.”

Mpo na nini balobaki “jesi” kasi balobaki te “ebele”? Ezali kolakisa ete bazali na bitumba. Yango wana biso bakristo tosengeli te kolala, kasi tótelema, tózua bibundeli, mpe tómatisa mayele na biso ya kosalela Liloba ya Nzambe.

Yango wana, tosengeli kokota mozindo na boyekoli ya Liloba ya Nzambe, mpe koyekola ndenge ya kosalela yango. Nkolo Yesu azalaki ndakisa malamu: Satana ayaki na Liloba, kasi Yesu azalaki na Liloba koleka. Ntango Satana abetaki ye na mopanga, Yesu

abatelaki yango mpe akataki ye na mayele ya kosalela Liloba.

Bongo mpe na bomoi na biso ya lobiko, makambo mingi Satana azali kosala biso mabe na yango, mpo kaka tozangi mayele ya kosalela Liloba. Liloba tozali na yango, kasi ndenge ya kosalela yango nde esilaka biso, mpe monguna asalelaka yango mpo na kobebisa biso.

Sikoyo, tokoki kosala nini mpo tosala Liloba malamuna mpe tolonga mayele ya Satana? Ezali koyekola Liloba na molende, kasi kaka kotanga te. Bokaboli monene ezali kati na kotanga mpe koyekola.

Mwana ya kelasi ya ebandeli oyo ayekoli kotanga lelo, soki opesi ye buku ya bioloji ya kelasi ya suka, akoki kotanga yango mobimba, mpe ata kokanga maloba mosusu na motó. Kasi ayekoli eloko moko te.

Bongo mpe biso, tosengeli te kaka kotanga Biblia, kasi tosengeli koyekola yango: kofanda, kotala buku moko, kosepela na yango, koluka lisusu boyebi awa na kuna, mpo totia “nyama” na oyo totangi. Kaka kotanga verse moko te sans kososola mposa na yango.

Nkolo asalisa biso mpe atondisa biso Molimo Mosantu, mpo tózala na mayele ya kosalela malamụ Liloba na Ye.

2 Timote 2:15 elobi:

“Sala makasi mpo omimonisa liboso ya Nzambe lokola mosali oyo andimami, oyo azangi soni, OYO AZALI KOSALELA MALAMU LILOBA YA SOLO.”

(Mokanda)

Nkolo apambola bino.

Share on:
WhatsApp